

Aðalfundar Sorpurðunar Vesturlands hf. haldinn miðvikudaginn 19. mars 2018 kl. 13 á Hótel Hamari, Borgarbyggð.

Formaður Kristinn Jónasson setti fund og bauð fundarmenn velkomna. Hann gerði tillögu um Svein Pálsson sem fundarstjóra og Hrefnu B Jónsdóttur sem ritara.

Hrefnu falið að koma kjörbréfum til fundarstjóra auk þess að vinna störf kjörnefndar.

1. Skýrsla stjórnar fyrir liðið starfsár.

Kristinn Jónasson, formaður fór með skýrslu stjórnar Sorpurðunar Vesturlands hf. Sjá nánar í framhaldi fundargerðar.

2. Ársreikningar félagsins og grænt bókhald.

Heildartekur félagsins eru 108.717.031 kr. Rekstrargjöld eru 61.727.997 kr. fjármunatekjur 4.425.206 kr. Og tekjuskattur 10.286.208 kr. Hagnaður ársins 41.128.032 kr.

3. Ákvörðun um þóknun til stjórnarmanna.

Gerð er tillaga um að stjórnarlaun taki mið af þingfararkaupi. Greiðsla verði fyrir hvern fund. Formanns laun verði 5% eða 55.060 kr og aðrir stjórnarmenn kr. 27.540. ½ dagpeningur greiddur pr. fund og akstur greiddur samkvæmt reglum RSK hverju sinni.

4. Lagabreytingar

Stjórn Sorpurðunar Vesturlands samþykkti samhljóða á fundi sínum 23.02 2018 að leggja til að gerðar verði breytingar á 21. gr. samþykktu félagsins á aðalfundi þess, en fundurinn fer fram 19 mars 2018.

Greinin er svohljóðandi í dag:

Á aðalfundi félagsins skal kjósa einn löggiltan endurskoðanda eða endurskoðendafélag og einn skoðunarmann, til tveggja ára í senn. Þeir mega ekki hafa unnið við gerð reikninga félagsins og ekki vera stjórnar- eða starfsmenn þess. Endurskoðandi og skoðunarmaður skulu fara yfir allt reikningshald og alla reikninga félagsins og er þeim jafnan heimill aðgangur að öllum bókum þess og skjölum. Endurskoðandi og skoðunarmaður skulu hafa lokið endurskoðun ársreiknings eigi síðar en tveim vikum fyrir aðalfund. Ber þeim þá að senda hann til stjórnar með athugasemdum sínum. Stjórn skal semja svör við athugasemdum endurskoðanda og skoðunarmanns og skulu þau svör, ásamt athugasemdum endurskoðanda og skoðunarmanns liggja frammi fyrir hluthafa, ásamt ársreikningi að minnsta kosti 7 dögum fyrir aðalfund.

Stjórn leggur til að hlutverk skoðunarmanns verði fellt úr samþykktum og því hljóðar ný tillaga að 21.gr. samþykktu Sorpurðunar Vesturlands svo eftir breytingar:

Á aðalfundi félagsins skal kjósa einn löggiltan endurskoðanda eða endurskoðendafélag, til tveggja ára í senn. Endurskoðandi má ekki hafa unnið við gerð reikninga félagsins og ekki vera stjórnar- eða starfsmaður þess. Endurskoðandi skal fara yfir allt reikningshald og alla reikninga félagsins og er honum jafnan heimill aðgangur að öllum bókum þess og skjölum. Endurskoðandi skal hafa lokið endurskoðun ársreiknings eigi síðar en tveimur vikum fyrir aðalfund.

Ber honum þá að senda hann til stjórnar með athugasemdum sínum. Stjórn skal semja svör við athugasemdum endurskoðanda og skulu þau svör, ásamt athugasemdum endurskoðanda liggja frammi fyrir hluthafa, ásamt ársreikningi að minnsta kosti 7 dögum fyrir aðalfund.

5. Ákvörðun um hvernig fara á með hagnað eða tap félagsins á reikningsárinu.

Gerð er tillaga um að 25% arður verði greiddur til eigna félagsins. Samþykkt.

6. Kosning stjórnar.

Arnheiður Hjörleifsdóttir
Finnbogi Leifsson
Kristinn Jónasson
Sturla Böðvarsson

Ásta Kristín Guðmundsdóttir
Karitas Jónsdóttir
Sævar Jónsson

7. Kosning löggilts endurskoðanda.

Gerð tillage um að KPMG verði áfram löggiltur endurskoðandi félagsins. Samþykkt.

8. Önnur mál sem hafa verið löglega fram borin eða fundurinn samþykkir að taka til meðferðar.

Engin.

Fundi slitið kl. 13:50.

Fundarritari: HBJ

SKÝRSLA STJÓRNAR

Aðalfundur Sorpurðunar Vesturlands 2018

Sorpurðun Vesturlands er hlutafélag í eigu sveitarfélaganna á Vesturlandi og hefur aðsetur að Bjarnarbraut 8, Borgarnesi. Starfsemi fyrirtækisins fer fram í Fíflholtum á Mýrum og felst í móttöku og urðun á úrgangi sem þangað er fluttur af öllu Vesturlandi auk þess sem opnað hefur verið á móttöku úrgangs frá sveitarfélögum á Vestfjörðum.

Í stjórn félagsins eru: Kristinn Jónasson formaður, Arnheiður Hjörleifsdóttir varaformaður, Ásta Kristín Guðmundsdóttir, Finnbogi Leifsson, Karitas Jónsdóttir, Sturla Böðvarsson og Sævar Jónsson.

Framkvæmdastjóri er Hrefna B. Jónsdóttir

Núverandi starfsleyfi var gefið út 5. febrúar 2014 og gildir til ársins 2028. Umhverfisstofnun hefur eftirlit með starfseminni. Samkvæmt starfsleyfinu er urðunarstaðnum heimilt að taka við öllum meðhöndluðum úrgangi öðrum en spilliefnum.

Samtals voru urðuð 14.169 tonn af úrgangi í Fíflholtum á árinu 2017. Af því magni komu 2.824 tonn frá Vestfjörðum. Frá Vesturlandi bárust því 11.345 tonn. Samkvæmt þessu jókst heildarmagnið um 12,5% á milli ára, en árið 2016 bárust 12.586 tonn inn til urðunar. Þá hafði magn úrgangs einnig aukist um rúm 12% milli ára, þannig að heildaraukningin á þessu tveggja ára tímabili er veruleg, (rúm 26%). Þann 1. ágúst 2017 var byrjað að taka gjald fyrir kurlað timbur og bárust 286.120 kg af timburkurlu eftir að gjaldtaka hófst.

Í árslok 2017 hafði úrgangur verið urðaður í Fíflholtum í rúm 18 ár og var heildarmagn urðaðs úrgangs frá upphafi þá komið í 187.973 tonn. Þar af hafa 61.325 tonn verið urðuð í rein 4, sem er sá urðunarstaður sem starfræktur er í dag.

Alls þurfti að grípa til lokunar urðunarstaðarins 11 sinnum á árinu 2017. Oft var um hluta úr degi að ræða en mjög hvasst getur orðið í Fíflholtum.

Á árinu 2017 var 483 m³ af mól, 5.402 tonntimburkurl, mold 5.400 tonn og drenmöl 1.022 tonn notað sem yfirlag á urðunarreinina. Samkvæmt starfsleyfi er skylt að byrgja samdægurs úrgang sem lagður hefur verið í urðunargryfju. Mikið magn efnis þarf til og hefur timburkurl verið notað í þeim tilgangi að spara jarðveg.

Borið var í þá vegi innan urðunarsvæðisins sem flutningstækjum er ekið eftir. Alls voru 483 rúmmetrar fluttir úr Kaldá inn á svæðið í þeim tilgangi. Drenefni er ekið jafnóðum inn í botn gryfjunnar úr námu innan urðunarsvæðisins.

Núgildandi starfsleyfi urðunarstaðarins í Fíflholtum gildir til ársins 2028 eins og áður segir. Einnig eru í gildi fyrirmæli Umhverfisstofnunar, dags. 11. júní 2014, um

frágang á vöktun eldri urðunarstaðarins á svæðinu. Vöktun urðunarstaðanna tveggja (eldri og nýrri) er aðskilin, en skv. grein 1.8 í fyrirmælum Umhverfisstofnunar um frágang og vöktun eldri staðarins er heimilt að samnýta mælingar vegna beggja staðanna. Fylgst hefur verið með efnainnihaldi sigvatns frá eldri urðunarstaðnum frá upphafi og til er yfirlit yfir greiningarnar frá og með árinu 2002.

Hreinsikerfi urðunarstaðanna hvors um sig samanstendur af fituskilju og síubeði. Bæði kerfin voru endurnýjuð á árinu 2016 og sigvatni hleypt í þau í október það ár. Fljótlega fór að bera á vandamálum í hreinsikerfi nýrri urðunarstaðarins (rein 4). Rennsli í útrás fór ört minnkandi á fyrstu vikunum eftir að kerfið var tekið í notkun og vatn tók að safnast upp syðst í urðunarreininni. Þá flæddi vatn upp úr fituskiljunni við enda reinarinnar. Fljótlega varð ljóst að stífla hafi myndast í síubeðinu. Í framhaldi af því var ákveðið að veita uppsöfnuðu yfirborðsvatni út í útrásarskurð um yfirfall frá tengibrunni. Þessu verki var lokið um miðjan desember 2016 og komst vatnsstaðan fljótt í eðlilegt horf. Í byrjun árs 2017 var Gunnar Svavarsson, hjá verkfræðistofunni EFLU, fenginn til að rýna hönnun hreinsivirkisins og setja fram tillögur til úrbóta. Niðurstaðan varð að gera þyrfti verulegar breytingar á síubeðinu og var það tekið upp sumarið 2017. Við þá aðgerð kom í ljós að efstu sandlögin í beðinu höfðu fyllst af svifögnum og voru orðin að mestu ógegndræp. Skipt var um allan sand í beðinu og það fyllt á nýjan leik með grófara efni. Þessu verki lauk haustið 2017, en ákveðið var að ganga ekki frá yfirborði síubeðsins fyrr en vorið 2018 þegar árangur breytinganna væri kominn í ljós.

Samstarf sorpsamlaganna á SV-horninu var með sama sniði á árinu og verið hefur. Fulltrúar stjórnar samlaganna og framkvæmdastjórar fóru í skoðunarferð til Noregs og Svíþjóðar 25.-28. júní 2017 með það að markmiði að skoða mismunandi úrgangslausnir. Hópurinn, sem taldi samtals 13 manns, kom fyrst við í Tromsø í Noregi, þaðan var haldið til Greve í Tönsberg og RoAF í Osló og endað í Gautaborg. Þrír stjórnarmenn frá Sorpurðun Vesturlands fóru í ferðina auk framkvæmdastjóra.

Á árinu 2012 vann Mannvit úr gasmælingum sem gerðar höfðu verið í Fíflholtum frá árinu 2010. Unnin var forhönnun gassöfnunarkerfis fyrir urðunarrein 4. Forsendur gerðu ráð fyrir að safnkerfið yrði sett upp með brennslu hauggass í huga en ekki hreinsun. Ekki var þó hafist handa við uppsetningu á söfnunarkerfi, þar sem ekki var talið tímabært að hefja þá vinnu fyrr en lengri tími væri liðinn frá upphafi urðunar í urðunarrein nr. 4.

Á fundi stjórnar Sorpurðunar Vesturlands 20. október 2017 var samþykkt að ganga til samninga við ReSource International um hönnun á gassöfnunarkerfi í urðunarrein nr. 4, þó með þeim fyrirvara að fyrirhugaður kyndill/brennari stæðist íslenskar aðstæður. Unnið hefur verður að þessu verkefni á síðastliðnum mánuðum.

EFLA verkfræðistofa hefur séð um mánaðarlegar mælingar á útstreymi hauggass úr gasrörum á urðunarsvæðinu og hefur Alexandra Kjeld, verkfræðingur, annast þessar mælingar. Í sömu ferðum hafa verið gerðar mælingar fyrir rannsóknarverkefnið

„oxun metans í yfirborðslagi“ sem Alexandra hefur unnið að ásamt fleiri sérfræðingum á EFLU, sjá neðar.

Í tengslum við gasmælingarnar stóðu EFLA verkfræðistofa, Samband íslenskra sveitarfélaga og Sorpurðun Vesturlands hf. saman að styrkumsókn til umhverfis- og auðlindaráðuneytisins um fjárhagslegan stuðning við rannsóknarverkefni sem leitt gæti til minni losunar gróðurhúsalofttegunda frá urðunarstöðum á Íslandi. Óskað var eftir stuðningi annars vegar vegna aukinna rannsókna á oxun metans á fleiri urðunarstöðum og hins vegar vegna beinna mælinga á metani við urðunarstaði. Veittur var 3ja milljóna kr. styrkur til verkefnisins og í ágúst 2017 komu starfsmenn Tækniháskóla Danmerkur (DTU) til Íslands með sérhannaðan búnað til mælinga. Gerðar voru mælingar á nokkrum stöðum á landinu dagana 28. júlí – 15. ágúst. Í Fíflholtum voru gerðar tvær mælingar, þann 31. júlí og 3. ágúst, þar sem mældur var metanstyrkur neðanvinds. Um er að ræða aðferð sem umhverfissvið DTU hefur verið með í þróun frá því á árinu 2010 og notað með góðum árangri, nánar tiltekið svonefnda gasstrókaaðferð. Aðferðin var upphaflega þróuð til að geta mælt heildarlosun frá urðunarstöðum eftir að lífrænar þekjur höfðu verið lagðar yfir staðinn. Mælingar af þessu tagi eru mikilvægar þar sem urðunarstaðir þekja gjarnan mikið landsvæði og losun metans frá yfirborði er ekki endilega samfelld. Niðurstöðuskýrslu er að vænta snemma árs 2018.

Á árinu 2012 hófust rannsóknir í Fíflholtum á oxun metans í yfirborðslagi urðunarreinanna. Tilgangur rannsókna hefur annars vegar verið að meta í hve miklum mæli örverur í yfirborðsjarðvegi ná að oxa metan sem streymir úr haugunum og hins vegar að vakta þessa oxunarvirkni við mismunandi veðurfarsaðstæður. Gasmælingar í yfirborði reinanna voru fyrst framkvæmdar á tímabilinu ágúst 2012 – ágúst 2013 sem hluti af rannsóknarverkefni við Háskóla Íslands í samstarfi við Samband íslenskra sveitarfélaga, Sorpurðun Vesturlands og EFLU verkfræðistofu. Í ágúst 2014 var bætt við mælireitum og mælingum þar með fjölgað til að fá betri upplýsingar um virkni núverandi yfirborðslags til að oxa metan í hauggasi, sem og um hlutfall metans sem raunverulega losnar í andrúmsloftið frá reinum. Mælingar hafa verið gerðar mánaðarlega sem fyrr segir. Gerð hefur verið grein fyrir framgangi verkefnisins í grænu bókhaldi Sorpurðunar Vesturlands hf. frá upphafi þess. Lokamælingar munu fara fram í janúar 2018 og í framhaldinu verður Sorpurðun Vesturlands hf. skilað skýrslu um niðurstöðurnar.

Á síðustu misserum hefur safnast upp haugur af veiðarfærum í Fíflholtum, þrátt fyrir samning Samtaka fyrirtækja í sjávarútvegi við Úrvinnslusjóð um ráðstöfun úrgangs af þessu tagi. Móttöku veiðarfæraúrgangs hefur nú alfarið verið hætt, en ekkert hefur þokast í þá átt að senda þennan úrgang burt af svæðinu. Ekki verður því annað séð en hann muni enda í urðun í enda urðunarreinarinnar.

Sunnudaginn 19. nóvember 2017 kom upp eldur í urðunarrein 4 í Fíflholtum. Eldsins varð strax vart og voru þegar gerðar viðeigandi ráðstafanir. Óverulegt magn úrgangs brann. Bruninn var tilkynntur Umhverfisstofnun með bréfi, dags. 22. nóvember.

Rekstur Félagsins árið 2017 gekk mjög vel og varð x hagnaður af starfsemi félagsins. Félagið á nú töluverðar fjármuni sem mun nýtast félaginu á næstu árum í þeim verkefnum sem félagið þarf að fara í og geri ég ráð fyrir að framkvæmdir næstu ára ættu að geta fjármagnast fyrir eigið fé og því þurfi ekki að koma til lántöku af hálfu félagsins sem er mikið fagnaðarefni fyrir eigendur félagsins. Hrefna mun fara ítarlega yfir reksturs félagsins hér á eftir.

Vil ég í lokin þakka meðstjórnarmönnum mínum fyrir afar gott samstarf og starfsmönnum í Fíflholti fyrir þeirra framlagt til félagsins. Hrefnu færi ég sérstakar þakkir fyrir hennar störf fyrir félagið en hún hefur verið vakin og sofin yfir rekstri félagsins.